

Lettre Jèrriaise, lé 24 dé Mai.

Bouônjour à tous, ch'est Ken Vibert dé Grosnez tchi vos présente la lettre Jèrriaise aniet Sanm'di lé 24 dé Mai 2025.

Lé 8 dé Mai ch't'année, j'èrchévînmmes eune visite d'un groupe dé Coutances, la ville avec tchi j'sommes jeunmelés, en Nouormandie. I' n'vîntent qué pour trais jours, neuf dé ieux, m'nés par Mme Gaetanne Pitois, ieune des Maires Adjoint, tchi r'présentait Mons. Jean -Dominique Bourdin, lé Maire. Il avait 'té invité par lé Connetabl'ye dé St Ouën pour participer ès célébrâtions du huiptantchième Annivèrsaithe dé la Libéthâtion, mais n'pouvait pas v'nîn li-même. Tandî qu'i' taient avec nous, j'prînmes l'occâsion dé fêter les 25 ans du jeunmelage entre nos deux populâtions. Et j'm'en vais vos raconter l'histouaithe dé comment qu' v'là tch'i' fut établyi.

La niet du 24 Mai 1997 avait 'té hardi rude. Il avait venté la pé du dgiâbl'ye, et quand les quat' St Ouennais arrivîtent à Gouôrray pour prendre lé baté pour Carteret, la mé s'battait contre la cauchie et les louêmes v'naient par en d'ssus d'la muthâle. Jé n'pensionmes dgêthe qué l'baté s'n'allait aller. Raiqué r'garder la mé nos donnait la faibliaiche dans les gambes. Nou nos dit qué l'baté 'tait en route et tch'il allait être raiqué eune demié-heuthe en r'tard. Quand i' vînt, les passagièrs n'avaient pon d' bouonne couleu et y'en avait même tch'i' fallait aver des ambulances pour les prendre. Y'avait tchiques êlus dé la Nouormandie sus l'baté tchi 'taient v'nus pour la cérémonie du jeunmelage dé la Pâraisse dé St Martîn et la ville du Mont Martin, tch'allait s' faithe au Châté d' Gouôrray. Lé président d'la Nouormandie, Mons. Pierre Aguiton, fut oblyigi d'aller à la maïson du Baillyi, Lé Sieur Philip Bailache pour sé couochi, il avait 'té si malade. Malgré chennechîn, il' annonchîtent qué l'baté s'n'allait r'touônner à Carteret, et j'montînmes à bord. La mé 'tait hardi mauvaise auve dé hardi gros creux et j'fûmes chabolés pour les preunmiés 10 à 15 minutes, d'avant qu' la mé sé calmit et l'restant du pâssage fut, pas bouôn, mais pas trop mal quand même. Ken Syvret lé député d'St Ouën du jour, Percy L'Masuthi lé vièr député et l'Sénateu Jean L'Maistre 'tait avec mé pour distchuter avec le Maire dé Coutances et ses adjoints les détails dé not' jeunmelage ensembl'ye.

J'avais fait un discours à la mairie de Coutances en 1996 où'est qu' j'avais invité l'maire, Mons. René Audoire, à accompagner l'équipe de pétanque tchi 'tait pour jouer contre le clobbe des Tchennevais. I' vînt avec sa femme et restit siez nous à Grosnez où'est qu' l'idée d'un jumelage fut distchuté avec Jean L'Maistre.

À ch't'heu j'tionmes à Coutances pour pâler avec les élus. J'décidînmes qu'é ch'tait eune bouonne idée, et qu'é l'préchain pas 'tait de demander à nos assemblées d'accorder, mé à eune assemblée pârouaïssiale et ieux à lus conmité municipal. Ch'la fut fait, et en 1999, eune charte fut sîgnée à Coutances. Et pis eune deuxième charte fut sîgnée au Mangni d'St Ouën, la préchainé année. Lé jumelage entre nous avait 'té fait, et v'là tchi marchit hardi bein avec des visites de toutes les sortes, faites dans les deux directions. À Coutances pour Le Festival de Jazz et des compétitions de tir. À St Ouën pour jouer au foot, pour la Bâtales des Fliers et bein d'autres visites sociales, même d'la goût'tie d'Calvados. Des amiêtchis furent faites tch'ont duthé pour des années, et tout marchit de bouôn pas, jusqu'à l'année d'Covid quand Coutances 'tait pour visiter pour célébrer les 21 ans d'jumelage. La visite tch'allait s'faite au Mangni d'St Ouën, à l'invitation du Seigneur, eut à être abandonnée. Aue tout arrêté, des deux côtés, y'avait rein à faite, et j'avons ieu grand' diffitchulté à s'rengagi d'pis. Chutte visite pour la Libéthation a 'té l'pas de tchi qu'j'avions bésouain pour ravigoter nos r'lâtions. J'ai toute confiance qu'é si j'pouvons encouothagi des personnes pus jannes de nos joindre le jumelage a toute chance de prospéther pour bein d's années à l'av'nîn.

Et bein n'en v'là assez pour aniet. Merci d'm'aver écouté et à la préchainé.